

Qasigiannuguit Aasiaallu akornanni erngup nukinganik nukissiorfiliornissamut misissuinerlut atatillugu nunaqarfiit qanigisaaniittut erngup nukinganik nukissiuutillu ataavartut allat atorlugit nukissiorfilernissaannik periarfissat misissoqqullugit peqquneqarnissaannik siunnersuut. Misissuinermit Igalikumi nukissiuutinik ataavartunik assigiinngitsunik atuinermik misileraanermit maanna ingerlasumit misilittakkat ilanngunneqassapput misissuinerullu inernerera kingusinnerpaamik UPA2017-mi Inatsisartunut saqqummiunneqassalluni.

(Inatsisartuni ilaasortaq Ane Hansen, Inuit Ataqatigiit)

Akissuteqaat

(Pinngortitamut, Avatangiisinut Nukissiuuteqarnermullu Naalakkersuisoq)

Siullermeerneqarnera

Naalakkersuisut sinnerlugit Inuit Ataqatigiinniit Inatsisartunut ilaasortaq Ane Hansen aalajangiiffigisassatut siunnersuuteqarneranut qutsavigaara.

Naalakkersuisut Qasigiannugani, Aasianni nunaqarfinnilu eqqaanniittuni nukissiuutinik ataavartunik pilersuinissamut periarfissanik misissuileruttorput. Tassalu siornali Qasigiannugani, Aasianni, Akunnaami, Kitsissuarsunni Ikamiunilu erngup nukinganik nukissiuutinilluunniit ataavartunik allanik pilersitsisoqarsinnaaneranut periarfissanik misissuinerit aallarteqqinneqassasut Naalakkersuisut aalajangerput. Misissuinerit annertupput, tassanilu teknikkimut inuiaqatigiillu aningaasaqarnerinut tunngasut misissorneqartussaapput. Misissuinerit ingerlapput, taakkulu 2017-ip ingerlanerani naammassinissaat naatsorsuutigineqarpoq.

Aasianni Qasigiannuganilu erngup nukinganik innaallagissiorfiliorsinnaanermut periarfissanik misissueqqissaarnerit inernerit maannarpiaq nutarterneqarput. Tamatuma peqatigisaanik nukissiuutinik ataavartunik allanik, soorlu seqernup qinngornerinik, anorimik, immap ulittarneranik tinittarneranillu aammalu nukissiuutinik atuinikillisaaniarluni suliniutinik atuiffiusunik atuisinnaanermut periarfissat misissuiffigineqarput. Misissuinerit taakku naammasseriarpata, misissuinerit inernerit inuiaqatigiit aningaasaqarnerannik misissueqqissaarnermut sanilliunneqassapput, taamaalilluni aaqqiissutissat arlaat – aningaasaqarneq, avatangiisit teknikkilu eqqarsaatigalugit – pitsaanerunersoq naliliiffigineqarsinnaalissaaq.

Nukissiorfiit Igalikumi misiliilluni suliamik pissanganartumik, seqernup qinngornerinik, anorimik aammalu generatori dieselitortoq nalinginnaasoq atorlugu batteriitut katersiivimmik kattussinerup atorsinnaaneranut periarfissanik misileraaffiusumik aallartitsipput. Suliaq aallarnisarneqarpoq, Nukissiorfiillu 2017-imi ukiup ataatsip ingerlanerani tunisassiornermut paasissutissanik katersuissaaq. Taamaattumik misiliilluni suliami paasissutissat siulliit 2018-imi piareernissaat naatsorsuutigineqarpoq. Igalikumi misilittakkat siunissami nuna tamakkerlugu nukissiamik pilersuinerlut atorneqassapput.

Misissuilluaqqissaartoqarnissaa pisariaqarpoq, taamaalillutalu aningaasaliiffissat pitsaanerpaat, aammalu aningaasaliissutissat inuiaqatigiit aningaasaqarnerat eqqarsaatigalugu akisussaassusilimmik salliutissavavut. Aningaasaliiffissat nukissiuutinik minguitsunik pissarsiaqarfiginerpaasinnaasavut

aningaasaliiffigisassavagut, taamaalillutalu nunatsinni sumiiffinni tamani ilaqutariit suliffeqarfiillu tapersorsinnaassavavut.

Qasigiannugit Aasiaallu eqqaanni nukissiuutinik ataavartunik siuarsaasinnaanermut periarfissat misissorneqarneri aallartilluareermat, siunnersuut itigartinneqassasoq inassutigaarput.